

Төтенше жағдай енгізілген жерде халықаралық ізгілік көмекті бөлу ережесін бекіту туралы

Қазақстан Республикасы Үкіметінің 2004 жылғы 4 наурыздағы N 271 қаулысы.

"Төтенше жағдай туралы" Қазақстан Республикасының 2003 жылғы 8 ақпандағы Заңының 24-бабына сәйкес Қазақстан Республикасының Үкіметі қаулы етеді:

1. Қоса беріліп отырған Төтенше жағдай енгізілген жерде халықаралық ізгілік көмекті бөлу ережесі бекітілсін.

2. Осы қаулы қол қойылған күнінен бастап күшіне енеді.

Қазақстан Республикасының

Премьер-Министрі

Қазақстан Республикасы

Үкіметінің

2004 жылғы 4 наурыздағы

N 271 қаулысымен

бекітілген

Төтенше жағдай енгізілген жерде халықаралық ізгілік көмекті бөлу ережесі

1. Жалпы ережелер

1. Осы Ереже "Төтенше жағдай туралы" Қазақстан Республикасының 2003 жылғы 8 ақпандағы Заңын іске асыру мақсатында әзірленді.

Осы Ереже төтенше жағдай енгізілген жерде халықаралық ізгілік көмекті бөлу тәртібін айқындайды.

2. Төтенше жағдай енгізілген жерде халықаралық ізгілік көмекті бөлу тәртібі

2. Қажетті халықаралық ізгілік көмектің номенклатурасы мен жүктерінің көлемін аумағына төтенше жағдай енгізілген әкімшілік-аумақтық бірліктердің әкімдері жергілікті жер комендантының келісімі бойынша айқындайды.

Қазақстан Республикасына нақты мекен-жайлары көрсетілмей келіп түскен халықаралық ізгілік көмек төтенше жағдай енгізілген жерде қажетті жүктердің талап етілетін номенклатурасы мен көлеміне сәйкес бөлінеді.

Қазақстан Республикасы Премьер-Министрінің 2017 жылғы 27 наурыздағы № 38-ө өкімімен құрылған Қазақстан Республикасының халықаралық ізгілік көмек мәселелері жөніндегі комиссиясы (бұдан әрі – Комиссия) өзіне жүктелген функцияларға сәйкес халықаралық ізгілік көмекті пайдалану мәселелерін шешеді.

Ескерту. 2-тармаққа өзгеріс енгізілді – ҚР Үкіметінің 23.10.2020 № 701 қаулысымен

3. Халықаралық ізгілік көмек Қазақстан Республикасына оны алушылардың нақты мекен-жайлары көрсетілмей келіп түскен жағдайда, аумағына төтенше жағдай енгізілген әкімшілік-аумақтық бірліктердің әкімдері:

1) ізгілік көмек жүктерін орналастыру және сақтау үшін белгіленген санитарлық нормаларға сәйкес қоймалық үй-жайларды беруді, осы жүктерді орналастыруды;

2) халықаралық ізгілік көмекті Қазақстан Республикасы Төтенше жағдайлар министрлігінің өкілдерімен өзара іс-қимыл жасай отырып бөлуді;

3) ізгілік көмек жүктерін бөлу жөніндегі істің жай-күйі туралы Комиссияға мәліметтер беруді қамтамасыз етеді.

Ескерту. 3-тармаққа өзгерістер енгізілді - ҚР Үкіметінің 02.04.2015 № 173 (алғашқы ресми жарияланған күнінен кейін күнтізбелік он күн өткен соң қолданысқа енгізіледі); 23.10.2020 № 701 қаулыларымен.

4. Қазақстан Республикасына төтенше жағдай енгізілген жердің нақты мекен-жайлары көрсетіліп, халықаралық ізгілік көмек ретінде келіп түскен жүктер осы жүктерді тікелей алушыларға бөлінеді. Бұл ретте жүктерді алушылар Комиссияға халықаралық ізгілік көмекті бөлу жөніндегі істің жай-күйі туралы мәліметтер ұсынады.

5. Төтенше жағдай енгізілген жерде халықаралық ізгілік көмекті бөлуді және пайдалануды бақылауды Комиссия жүзеге асырады.

6. Қазақстан Республикасының ішкі істер органдары төтенше жағдай енгізілген жер комендантының келісімі бойынша:

1) халықаралық ізгілік көмек ретінде төтенше жағдай енгізілген жердің аумағына келген жүктерді қажет болған жағдайда, күзетуді және баратын жеріне дейін ілесіп жүруді;

2) заңды және жеке тұлғалардың халықаралық ізгілік көмек тауарларын осы жүктерді басқа заңды және жеке тұлғаларға өткізуі (сатуы) мақсатында заңсыз сатып алу фактілерін анықтауды қамтамасыз етеді.

7. Халықаралық ізгілік көмекті төтенше жағдай енгізілген жерде бөлу барысы туралы жұртшылықты хабардар етуді бұқаралық ақпарат құралдары саласындағы уәкілетті орган қамтамасыз етеді (жергілікті жердегі комендантпен келісу бойынша).

Ескерту. 7-тармақ жаңа редакцияда - ҚР Үкіметінің 02.04.2015 № 173 қаулысымен (алғашқы ресми жарияланған күнінен кейін күнтізбелік он күн өткен соң қолданысқа енгізіледі).